

春秋屬辭辨例編

春秋屬辭辨例編卷五十一目錄

四裔總論 夷蠻戎狄名屬四方辨

書我

廿氏誤以爲戎陸渾戎爲一辨 陰戎九州戎異說 自

潘者卽書之徐戎杜何以爲西戎氏羌辨

伐凡伯者穀

米以戎爲衛辨

書狄

伐衛盟邢稱人進狄辨 晉敗狄貶人辨 敗緘公穀說

書東夷 南蠻

戎狄書子論

春秋屬辭辨例編卷五十一

錢唐張應昌學

四裔總論 夷蠻戎狄各屬四方辨

司馬言九畿其外曰蠻夷藩鎮職方言九服其外亦曰蠻夷藩鎮是四夷皆服事天子也夷鎮藩服在行人總謂之蕃國蠻服在行人則謂之要服周家疆理通乎蠻夷閩貉戎狄矣而行人謂蕃國在九州之外者以其在六服外非九州內地爾既在九州之外則朝貢不常宜其一世以見而不及以中國之政也然豈以不在內地不及以政而置之度外乎夏官懷方氏掌來遠方之民致方貢遠物而送逆之治其委積館舍飲食是待夷狄之民猶吾民也秋官象胥掌蠻夷閩貉戎狄之國傳王言而論說以和親之若以時入賓則協其禮與其辭言傳之是待夷狄之使猶中國使也作夷樂以燕享所以說遠人帥夷兵而守衛所以柔遠人古人雖曰內華而外夷貴中國而賤夷

狄而待之之心未嘗不厚也此夷狄所以懷德慕義而來王也

葉時禮經會元

先王疆理天下制立五服蠻夷戎狄在要荒之內九州之中者則被之聲教疆以戎索唐虞三代之際其詳不可得知春秋所錄蠻則荆舒之屬也夷則萊夷之屬也戎則山戎北戎之屬也狄則赤狄白狄之屬也齊桓之所攘魏絳之所和其種類雖曰戎狄而皆錯處華地故不吝不有以制服而羈縻之至于沙磧之濱瘴海之外固未嘗窮兵殲武絕大漠踰懸度必欲郡縣其部落衣冠其旃毳以震耀當時而誇示後世也秦始皇既并六國始北卻匈奴南取百粵至漢武帝時東并朝鮮西收甘涼南闢交趾朱厓北斥朔方河南以至車師大宛夜郎昆明之屬俱招來羈置之俾通上國

馬端臨文獻通考

公會戎于潛戎者戎之君也曷爲不以其君稱之不與君稱也禮樂

不及朝聘不與有故然後著其名爵外之也

劉敞春秋傳

戴記曲禮篇稱東夷北狄西戎南蠻土制明堂位皆以蠻夷戎狄分屬四方說者沿而不察按禹貢梁州云和夷底績緇之詩云昆夷駉矣孟子云文王事昆夷是西亦有夷也詩韓奕云以先祖受命因時百蠻是北亦有蠻也春秋公盟戎追戎齊伐山戎楚大饑戎伐之是東南北皆有戎也蓋蠻夷乃四方之總稱而戎狄則蠻夷種類部落之號非以四者分四方也故禹貢云五百里要服三百里夷二百里蔡五百里荒服三百里蠻二百里流堯典亦云蠻夷猾夏是九州之外皆爲蠻夷未嘗分戎與狄也蓋夷猶裔也裔猶邊也以在九州邊竟故附見于九州在冀揚爲島夷青爲嵎夷萊夷徐爲淮夷梁爲和夷謂之要服則是猶有禮教存焉故傳稱用夷禮是夷未嘗無禮蠻則蠢然無知故但謂之荒服然則蠻夷以內外分不以東南分四方皆有夷亦皆有蠻不得專屬之東南也蓋唐虞都冀北近南遠每服

雖約以五百里然北常狹南常廣故蠻在南方爲多而記禮之家多齊魯之土地近東夷遂誤以夷專屬之東而以蠻專屬之南耳戎者西方蠻夷之一猶其有氐與羌也狄者北方蠻夷之一猶其有追與貊也其見於經傳者尙有百濮百越之屬惟戎與狄最盛分居四方狄或居冀或居雍而戎或鄰於秦於楚於晉於齊於魯於燕猶氐羌之盛於漢晉間也春秋書戎狄數十事未有書夷蠻伐某國及會夷盟蠻伐夷侵蠻者而春秋傳吳楚邾莒往往稱爲蠻夷亦未有稱爲戎狄者是戎狄爲國名而蠻夷乃其週稱明矣大抵載記諸篇漢儒所撰其說多沿傳誤攷古者當取信於經也

崔述豐鎬考信別錄

潞氏白狄諸國皆受子爵於周以時享貢猶六代之義陽蠻仇池楊氏及今邊省土司苗獠無地無之固不一處蓋附塞而居控禦塞外故中國不守邊而自固所謂天子有道守在四夷也

王氏之神

晉之南境爲姜戎東境爲葷中之戎與驪戎北境爲無終諸戎而姜戎自南境接於西境以得嬰秦師也晉之北境爲白狄東境爲赤狄而驪戎亦稱麗土之狄大略晉四面皆戎狄亦用之以爲強故襄公用姜戎悼公用無終之戎成公剪赤狄景公同白狄伐秦平公用陰戎獻公剪麗土之狄而惟白狄最久至春秋之末爲鮮虞至七國爲中山

全祖望經史問答○按晉語文公將納王行賂于葷中之戎與麗土之狄以求東道注二邑戎狄間在晉東

周家夷狄之患太王避之周公膺之至於春秋二霸所以成霸功諸侯所以敵王愾者用此

李石方舟集

惠王之世北有狄人南擾至於邢衛矣南有荆楚北伐至於鄭矣桓公卻狄帖荆有功於諸華甚大

金履祥通鑑前編

春秋戎先見荆次之狄次之而荆暴於戎狄又暴於荆當惠王世交伐諸夏使無齊桓攘服定之豈復有中國哉

呂本中集解莊三十二引許翰

古者邊境之患明王在上驅攘之功一出於天子若文王采薇之師
宣王六月之伐是也周衰王道不振四方窺侮始也假好於禮文終
也逞志於鋒鏑侵陵大邦夷滅小國聖人傷焉書之不少略焉書戎
者十三書狄者三十六計狄之見經兩倍於戎蓋戎自隱桓以來雖
先入春秋而侵擾中國北狄爲少賴小白主霸稱兵屢伐其勢遂衰
僖文之後於經傳罕見不過助晉敗秦會晉結盟及敗王師而止耳
而陸渾滅於晉蠻子殺於楚晉又執蠻子赤而歸之其衰弱可知矣
至狄則自莊公末年驟陵華夏遽以盛強伐邢八衛滅溫爲害最大
二霸折服強楚安視狄人之禍未嘗回戈而北向焉馴致文公之時
二霸旣沒諸侯無所倚重狄之跳梁又甚於前齊晉宋魯諸國交被
侵擾終宣之四年見經者凡二十有一厥後賴晉之力乘狄衰釁搗
其巢窟挫其鋒刃諸侯始得以紓難焉戎自僖十年齊侯許男伐之

浸以衰微罕見中國此霸王之功也至狄始於閔僖盛於文公至襄昭之後則不能病中國而中國反病之其衰微不復曩時之盛者亦時適然也

沈某比事

昔先王疆理天下建置侯甸而戎狄蠻夷猶錯處內地春秋時見於經傳者名號錯雜而大概亦約略可數焉戎之別有七其在今陝西之臨潼者曰驪戎秦置驪邑邑有驪山俱以戎得名其在鳳翔者曰犬戎蓋西戎之別在中國其先嘗攻殺幽王秦驅逐之至春秋時種類猶存閔二年虢公敗犬戎於渭汭是也其在瓜州者曰允姓之戎遠莫知其所居秦晉遷於中國則曰陸渾之戎今爲河南府嵩縣又曰陰戎又曰九州戎又曰小戎晉惠公母家也逮惠公歸自秦而誘以來處之陸渾世役於晉亦曰姜戎佐晉敗秦于殺自後無役不從亦數與會盟以其處晉陰地謂之陰戎昭十七年陸渾貳於楚晉荀

吳滅之其餘服屬於晉者謂之九州戎自晉滅陸渾城汝濱地而有之楚亦滅蠻氏係汝州之地而汝水南北遂爲晉楚分界其先陸渾而居伊洛之間者又有揚拒泉臯伊洛之戎揚拒泉臯皆戎邑王子帶曾召之以伐京師焚王城東門爲禍最烈自秦晉遷陸渾而此種浸微後泉戎地入於周爲前城而文八年公子遂因趙盾盟伊洛之戎於暴成六年與陸渾蠻氏同受命於晉侵宋則伊洛陸渾並爲晉之內臣矣蠻氏亦戎別種在汝州西南亦名茅戎以處茅津得名在今解州之平陸地頗遼遠成之元年王師嘗爲所敗後屬晉乃哀公之世晉執戎蠻子以畀楚而楚之強益不可制其在直隸之永平者曰北戎亦曰山戎春秋初嘗侵鄭伐齊已而又病燕齊桓北伐之襄四年無終子嘉父因魏莊子納虎豹之皮以請和諸戎者其別種也又有在山東之曹縣與蘭陽接壤者經直曰戎無名號春秋初屢與

隱公會盟隱九年凡伯來聘戎伐之於楚邱以歸所謂戎州己氏之戎是也胡氏以徐戎當之夫戎在魯西境徐戎在魯東郊凡伯聘魯還過楚邱而戎伐之豈所云東郊者乎凡此皆諸戎之大略也狄之別有三曰赤狄曰白狄曰長狄長狄兄弟三人無種類而赤狄之種有六曰東山皋落氏曰廐咎如曰潞氏曰甲氏曰留吁曰鐸辰潞爲上黨之潞縣處晉腹心宣十五年晉滅赤狄潞氏明年並滅甲氏留吁鐸辰留吁甲氏俱在今之廣平鐸辰在潞安境白狄之種有三其先與秦同州在陝之延安所謂西河之地其別種在今之眞定藁城晉州者曰鮮虞曰肥曰鼓鮮虞最強與晉數鬪爭而肥鼓俱爲晉所滅蓋春秋戎狄之爲中國患狄爲最諸狄之中赤狄爲最赤狄諸種族潞氏爲最晉之滅潞也其君臣用全力勝之荀林父敗赤狄于曲梁遂滅潞而晉侯身自治兵于稷以略狄土稷在河東之聞喜而曲

梁在廣平之雞澤綿地七百餘里旋復得畱吁之屬晉之疆土益遠
狄所攘奪衛之故地如朝歌邯鄲百泉其後悉爲晉邑狄之強莫熾
于閔僖之世殘滅邢衛侵犯齊魯其時止稱狄其後乃冠以赤白之
號意其種豪自相攜貳更立名目而遂以削弱易制傳云衆狄疾赤
狄之役遂成於晉此其徵也東方之夷曰萊曰介曰根牟後萊介
并於齊根牟滅於魯惟淮夷當齊桓之世嘗病郟病杞後復與楚靈
王連兵伐吳然皆竄伏海濱於中國無甚利害南方之種類不一羣
蠻在辰永之境百濮爲夷廬戎爲戎羣蠻當楚莊之時從楚滅庸自
後服屬于楚鄢陵之役從楚擊晉而虜戎與羅兩軍屈瑕後卒爲楚
所滅率微甚無足道者吾觀夫齊桓制霸存三亡國而終不敢加兵
於狄戎伐周而管仲平戎於王畿若儕於敵國而范文子謂狄爲三
晉自宣迄昭六七十年晉滅陸渾兼肥鼓剗潞氏畱吁鐸辰戎狄之

在河朔間者稍稍盡矣獨無終以詰和得存而鮮虞亦曰中山至戰國時爲列國僭號稱王後滅於趙焉顧棟高大事表○按以姜戎陸渾爲一踵杜誤辨見下

平王之遷戎爲之也襄王之出狄爲之也春秋之筆戎爲先狄次之

其末也淮夷列諸侯之會天下之變極矣王應麟困學紀聞

宣王之世王師敗於姜戎馴致驪山之禍東遷戎狄逼中國春秋之初狄最強滅黎滅衛滅邢伐晉戎且伐周執凡伯未有能正其罪桓文迭興諸侯聽命淮泗伊雒之間戎狄皆不敢肆且北戎敗於鄭又敗於齊狄屢敗於晉長狄亡於宋魯西戎取於秦及白狄赤狄潞氏甲氏留吁陸渾蠻氏無終之屬皆敗滅於霸主終春秋之世戎狄少安者盟主有以制其命也姜炳璋讀左補義

齊桓始霸伐戎而戎侵曹不能治伐山戎北戎而揚拒泉皋伊雒之戎入王城不能救狄爲邢衛患桓有存亡國之功然邢潰而後遷之

衛滅而後成之甚至滅溫侵畿甸而不能討晉文代興亦治不及狄蓋以荆楚之禍有大於戎狄者既盡力於彼則於此有不及圖也春秋既于齊晉以伯而詳書戎狄事亦所以責之備歟齊爲邢謀衛難與狄盟而使之侵衛衛既再遷而齊反受狄患不已有以來之也晉襄以姜戎敗秦師猶曰禦寇也宋辭葢牟之會而晉亦以伊雒之戎陸渾蠻氏侵之豈盟主服與國之道乎

趙汭屬辭

伯業興則御夷狄之權自我出伯政衰則與夷狄分其權伯統絕則折而從夷狄晉文主夏盟攘夷狄平公君臣偷安以諸侯授楚甘出其下至於季世遂執戎蠻界楚中國之體掃地矣

洪谷夔春秋說哀四年

吳越盟而莊王得以入陳鄭圍宋敗晉諸戎和而悼公得以三駕爭鄭未有邊鄙多故可以圖伯者也反而行之則夫差方敗齊長晉而

勾踐已入吳矣

何焯讀書記

書戎

杜氏誤以姜戎陸渾戎爲一辨陰戎九州戎異說
潛者卽書之徐戎杜何以爲西戎此義辨戎凡伯情微

梁以戎爲衛辨

西戎出自三苗蓋姜姓也其國近衡山及舜徙之三危夏后氏末蚩夷入居邠岐之間成湯攘之武乙暴虐犬戎寇邊周至幽王西戎寇周殺幽王周遂東遷平王之末隴山以東及乎伊洛往往有戎渭首有狄獯邽冀之戎渭北有義渠之戎洛川有大荔之戎渭南有驪戎伊洛有陸渾揚拒泉臯之戎潁洛以西有蠻氏之戎

杜佑
通典

四裔之中戎種最雜亂難稽或三名而爲一族或一種而隨地立名隨時易號至五六而未已盛衰之故略可見焉其別有七若文十六年戎伐楚西南則爲楚山間之戎非有名號不列於戎之數

顧棟高
大事表

問杜氏注左傳謂陸渾之戎卽姜戎姜戎卽陰戎又卽九州之戎蓋知是否曰以左傳諦考之姜戎卽陰戎陰戎卽九州之戎而似非陸

渾之戎蓋以戎子駒支之言叅之昭九年詹桓伯之言則姜戎卽陰戎無可疑矣而九州之戎在晉陰地見于哀四年則九州之戎卽陰戎無可疑矣杜氏曰陰地自上洛以東至陸渾則似乎卽陸渾之戎而實非也姜戎世爲晉役不他屬而陸渾則頗兼屬乎楚故昭十七年爲晉所滅至哀四年陸渾之滅已久而九州之戎仍見於傳則其非陸渾可知蓋陸渾左近之戎亦非一種觀左氏所云楊拒泉皋伊洛之戎在陸渾未遷之先則其地本多戎蠻大抵姜戎最近晉陸渾之戎則近楚唯近晉故殺之役晉得於倉卒中徵師唯近楚故荀吳滅之取道於周託言有事於洛與三塗惟近晉故蠻氏之亡蠻子奔晉唯近楚故陸渾之戎之亡陸渾子奔楚雖地本相接而各有所屬楊拒泉皋伊洛之戎最先次之則陸渾之戎秦晉所其遷姜戎則晉所獨遷晉霸之盛諸戎皆嘗受命成六年晉人侵宋有伊洛之戎有

陸渾有蠻氏三部俱與於役其後陸渾始屬楚

全祖望總史問答

傳曰來姜戎氏昔秦人迫逐乃祖吾離于瓜州杜注四嶽之後皆姜姓又別爲允姓此注以昭九年傳景王責晉之辭爲據然彼文云先王居檮杌于四裔故允姓之姦居于瓜州則其處此土舊矣似非秦人所逐又云惠公始誘以來使入我郊甸杜謂卽僖二十二年陸渾之戎遷伊川者是已今此姜戎自居晉南鄙非其族類也蓋當時非一種所處亦非一地謂姜姓別爲允姓豈其然乎以陸渾之戎爲姜姓亦非也

陸榮左傳附註

春秋之世諸戎種類實繁其由瓜州徙居中國者蓋有二種一曰姜姓之戎一曰允姓之戎姜戎以殺之役見春秋戎子駒支其後也范宣子數駒支稱秦人迫逐乃祖吾離于瓜州我先君惠公有不腆之田與汝剖分而食之而駒支亦云惠公獨其大德謂我諸戎四岳之

裔胄也。賜我南鄙之田。我諸戎除翦其荆棘，驅其狐狸，豺狼以爲先。君不侵不叛之臣。至于今不貳。是姜戎自瓜州徙晉南鄙而附庸於晉者也。允姓之戎居陸渾、陸渾、瓜州地名也。故稱陸渾之戎。僖公二十二年，秦晉遷之伊川。由是伊川亦有陸渾之名。其後生聚繁衍，或居晉陰地，謂之陰戎。晉梁丙、張趯率陰戎伐潁王，使詹桓伯辭於晉。曰：先王居檮杌於四裔，以禦魑魅。故允姓之姦居於瓜州。伯父惠公歸自秦而誘以來，使偪我諸姬入我郊。甸伊川乃周畿內之地。故云郊甸與姜戎之居晉南鄙者固有別矣。杜元凱謂四嶽之後皆姓姜，又別爲允姓，蓋欲合二種而一之。竊有未安。允姓之徙伊川在晉惠公時，晉猶未啟南陽。與伊川相去甚遠。何緣分南鄙之田以食之。且秦晉同欲遷之，非秦人追逐而晉特裂土而予之也。楚子嘗伐陸渾之戎矣，不聞其侵晉南鄙。則陸渾之戎非姜戎也。二戎族姓各殊，分

地亦別安得以其同出瓜州同徙於晉惠公時而遂混而一之乎

錢大

新晉研
堂集

愚按諸戎攷辨異說顧氏悉從杜注然元凱謂姜姓別爲允姓混姜戎陸渾爲一子餘陸氏謝山全氏竹汀錢氏辨之明晰則杜誤也至陰戎九州戎謝山謂卽姜戎而竹汀據傳詹桓伯語證陰戎非姜戎甚核謝山以九州戎見傳在陸渾旣滅之後駁杜而考杜解則云陸渾餘族分屬於晉也則仍宜從杜

春秋之世戎爲中國患亟矣雖然有由也先王居檣柅於四裔使夷不干夏戎不逼華周衰王政不行於是贅幣不通言語不同之人遂居衣冠禮樂之地莊僖之初經所書不過曰戎曰山戎曰北戎僖文之後始有所謂雜戎者姜戎者陸渾戎者雜戎居雜姜戎居於晉南陸渾居於伊川各號雖殊種類則一犬羊雜居蓋莫甚於東周之季

矣嗚呼戎狄是膺荆舒是懲周公之法也晉齊之伯均有功中國然以經攷之齊有攘戎之功晉有致戎之罪不可不察也何以言之魯隱之末戎狃於東遷之釁恣睢甚焉楚邱之變凡伯爲執侵曹之禍曹亦以歸是非細故小變矣然皆齊伯之未興與齊伯之未定也盟幽以後桓公始大振治戎之旅向者魯之盟會相尋凡以戎故燕之職貢不至亦以戎故自桓公遇魯以謀之而魯患息借許以伐之而燕釁弭戎之戢齊之力也而晉自惠之反實誘戎以遷於伊瀆之伯質挾戎以戰於穀自是以後晉嘗恃戎以爲犄角之助戎常事晉以爲不侵不叛之臣故其勢不得不至於陸梁異時徐吾之役瑕嘉亦既平茅戎於周矣而蠢蠢之衆猶得挾邠垂之怨以敗王師向之會范宣子嘗欲退駒支於盟矣而譎諂之辭終得援惠襲之舊以爲晉賜戎之張誰貨政之歟故嘗觀詹伯告晉之辭有曰戎有中國誰

之咎也。后稷封殖天下，今戎制之不亦難乎？吁！周公厲戎之云，廢矣。

桓公攘戎之功衰矣。晉人致戎之罪，不可道矣。

李氏列國世紀

隱公會戎盟，戎致凡伯見伐戎禍稍息，而狄伐中國，荆楚猶夏其禮，不可復制。春秋之末，漸主夏盟，楚衰而吳繼之，吳衰而越繼之，蠻夷之盛至於越，而春秋終矣。王綱盡矣。

程端學木義莊十年

葵邱未盟以前，齊桓有伐戎伐山茲之事。葵邱既盟以後，齊桓有伐北戎之事。蓋葵邱伯業極盛，而伯業之衰亦於是始。葵邱以前之桓公有志於天下者也，故伐戎伐山戎以公不以私。葵邱以後之桓公無志於天下者也，故伐北戎之事以私不以公。

趙汝金續匙

戎○卽戎州己氏之戎

隱二年杜注：陳畱濟陽縣東南有戎城，顧日在今山東曹縣。○哀十七年傳：公登城以望，見戎州。杜注：戎州戎邑姚培謙集注：今曹縣有

楚邱故城漢置己氏縣以戎州己氏而名

顧棟

○昆吾後己姓

季本
地考

隱二年春公會戎于潛

杜注潛魯地正義云戎是西方之夷必不遠來會魯顧曰據此

則潛蓋近戎之地當在今曹州府西南境○戎者徐戎也費誓

淮夷徐戎並與注徐戎在魯東故書序徐夷並與

淮夷但稱夷
故知戎是徐

也東郊不開舊註謂氏羌別種氏羌在西方註本曲禮西方曰

戎一語而誤也此是內夷雜處中國故得與中國通往來之禮

毛詩

○杜注何注皆以爲氏羌別種按氏乃有扈氏之裔子孫

遷流逾隴而西羌乃三苗姜姓之別自遷三危後漸入內地居

摩蜀是皆居西南內則武都外則河湟去山東懸隔春秋時不

聞東徙也注家泥東夷西戎之說而不知通耳

王夫之
稗疏

○昭元

年傳曰周有徐奄孔疏服虔云一曰魯公所伐徐戎也案費誓

云淮夷徐戎並與孔安國云淮浦之夷徐州之戎並起爲寇案徐戎是戎之在徐州者與徐國別書序云徐夷並與東郊不開則此戎在魯之東故得與奄相比非徐境矣梁履繩補釋十一○春書

會戎秋書盟戎所以責魯者至矣比事而觀使魯能辭潛之會則無盟戎之辱無盟戎之辱又安有戎伐凡伯于楚邱之禍哉然則隱公能守周公魯公之舊法戎狄是膺豈惟魯無夷狄之患王室亦尊安矣此春秋所以深罪中國而不責夷狄也鄭玉闕疑

又 秋公及戎盟于唐

戎猾夏而與之盟非義程子經說○此徐戎久居中國在魯東郊者

也周公膺戎狄伯禽征徐戎此魯人家法也而隱卽位之二年

春會之秋盟之隱於是乎無魯家法矣呂大圭或問○春會秋盟至

七年而戎伐天子之使戎敢無禮於王而魯乃結其好張自超宗朱辨義

隱七年冬天王使凡伯來聘戎伐凡伯于楚邱以歸

左戎朝周發幣於公卿凡伯弗賓冬王使凡伯來聘還戎伐之

於楚邱以歸○天子之使戎得執之天子不命討方伯不敵愾

書之見周室微弱四夷交侵諸侯無王家鉉翁詳說○穀梁曰戎者

衛也爲其伐王使貶而戎之若然是爲衛掩惡也如何勸懲乎

陸渚辨疑引啖助

桓二年秋公及戎盟于唐

懼戎爲患復修舊好季本私考

莊十八年夏公追戎于濟西

傳說見書追門○戎卽隱桓與盟者吳澂纂言○魯有戎患非一日

矣伯禽之初不免與費誓之師入春秋隱桓皆會而盟之蓋虞

其爲疆場之患也則戎之在魯不可一日不防莊公不修戎備

其來也如履無人之境疆吏安在哉去而追之何益也

趙鵬飛經全

莊二十年冬齊人伐戎

戎在魯西南魯之患也齊伐戎爲魯也追戎者公之威爲魯伐

戎者齊之德

張溥四傳斷

○餘見齊楚爭盟門○戎在曹衛魯之間

憑桓之所盟與伐凡伯侵曹者皆此戎也爲患尤近伯討所當

先也

趙鵬飛經全

○戎居北方議齊之後不先翦之未可以及遠也

故自是年書齊人伐戎至三十年冬書齊人伐山戎明年六月

書齊人來獻戎捷經營十年始成斬孤竹劑令支之績

何焯讀書記

莊二十四年冬戎侵曹曹羈出奔陳赤歸于曹

戎侵曹而羈出奔是曹懼戎而出其君也羈旣出赤乃入是戎

出羈而納赤也

汪克寬纂疏引陳岳

○已氏之戎本居曹縣與曹接壤故

得專廢置其君如秦之於晉齊之於魯是時桓公方盛而戎猶

如此橫亦甚矣

顧棟高

○戎能制曹廢置其君大書於策以病諸

夏也

朱朝漢畧記

莊二十六年春公伐戎 夏公至自伐戎

隱桓盟戎至莊公戎始變淪是以有濟西之役今報之

呂本中集解引

許

○戎卽在魯西南春伐而夏始至戎之難克可知

顧棟高 ○濟

西之追雖未及創之猶無害於魯也至侵曹而逐其君此中國

之大變非獨爲曹患而已齊桓方爲盟主置若罔聞魯能伐之

歸而飲至比事以觀衰之之義自見

朱朝漢畧記

○隱桓之會戎盟

戎不足結之徒自貶也莊之追戎伐戎不足威之徒黷武也馭

戎之道不弛備以啟侮亦不生事以邀功莊則戎已去而追之

戎不來而伐之以是策勳焉抑末矣

御纂直解

北戎○山戎○無終

昭元年孔氏正義曰釋例土地名以北戎山戎無終二名爲一北平有無終縣顧曰今直隸玉田縣治西有古無終城顧棟高○參看傳載小國無終

史稱齊桓救燕伐山戎至孤竹孤竹乃墨台氏之封漢曰令支今爲

永平之遷安縣在榆關之內此戎依山而居則薊州密雲東聯喜峰

口一帶高山峻谷自爲國邑與燕雜處者也王夫之裨疏

隱九年 傳北戎侵鄭

桓六年 傳北戎伐齊

北戎伐齊齊至乞師于鄭求成于諸侯則戎患亦熾矣非桓之

霸則燕齊皆爲戎矣金履祥通鑑前編

莊三十年冬齊人伐山戎

左冬遇于魯濟謀山戎也以其病燕故三十一年夏齊侯來獻

戎捷杜注山戎北狄○朱氏說及史記外傳語見齊楚爭盟門

僖十年夏齊侯許男伐北戎

無傳○杜注北戎山戎也

襄四年

傳無終子嘉父因魏莊子緝虎豹之皮以請和請戎

杜注無終山戎國名○晉方有事中原而無終遠在東北若用師焉楚爭陳鄭鞭長不及也故姑事羈縻蓋莊子一時之權計而後王巽懦者乃用爲口實何哉况戎先納賂以請和亦與屈

中國以事外夷者異矣

何焯讀書記

昭元年

傳晉中行穆子敗無終及羣狄于太原

注無終山戎孔疏北平有無終縣太原卽太原郡晉陽縣無終在太原東北二千餘里遠來與晉戰蓋與諸戎近晉者其來也

姜戎

全氏錢氏辨杜注姜姓別爲陸渾允姓之誤見前

晉及姜戎敗秦卽戎子駒支所謂晉人角之諸戎持之者也杜注居
晉南鄙正義云駒支自陳謂四岳之裔胄杜注四岳之後姓姜顧棟高
春秋外傳宣王敗績於姜氏之戎卽姜戎也戰於千畝則是時之姜
戎深入近鎬京矣而內傳昭九年言姜戎本居瓜州又言秦人逐之
居瓜州大抵周之盛時姜戎本安置瓜州宣王之時則已內遷及秦
人有岐西又逐之還其故土而晉惠公招致之使居晉之南境也全

望經史
問答

僖三十三年夏晉人及姜戎敗秦于殽

陸渾之戎○亦曰允姓之戎○小戎○陰戎○九州戎

顧口在今河南府嵩縣卽詹桓伯所謂惠公歸自秦而誘以來者昭九
年傳僖二十二年秦晉遷陸渾之戎于伊川陸渾本是敦煌地名徙之
伊川復以陸渾爲號詳見小國門昭十七年爲晉荀吳所滅昭二十九年
晉趙鞅荀寅

帥師城汝濱杜注汝

濱晉所取陸渾地

昭九年傳允姓之姦居于瓜州杜注瓜州今敦煌在今陝西省肅州

衛西五百二十里顧棟高大事表

伊洛王畿天地之中秦晉豈宜遷陸渾之戎居之不惟亂華其偏周

甚矣自此伊洛之戎世爲周患他日王謂晉人曰先王居檣杌於四

裔以禦魍魎允姓之姦居於瓜州伯父惠公歸自秦而誘以來使偏

我郊甸戎有中國誰之咎也然則秦晉之罪不可勝誅矣金履祥通鑑前編

昭九年晉梁丙張趯率陰戎伐潁杜注陰戎陸渾之戎處晉陰地謂

之陰戎傳又稱允姓之姦杜注允姓陰戎之祖與三苗俱放三危者

僖二十八年傳小戎子生夷吾杜注小戎允姓之戎也○陸渾卽小

戎之徙于中國者顧棟高

昭二十二年晉籍談荀躒帥九州之戎以納王子于王城哀四年士蔑

致九州之戎將裂田以與蠻子杜注九州戎卽陸渾之戎自宣三年楚莊伐陸渾之戎陸渾遂貳於楚昭十七年晉荀吳滅之陸渾子奔楚餘衆屬晉爲九州戎州鄉屬也五鄉爲州

宣三年春楚子伐陸渾之戎

諸說見晉楚爭盟門○陸渾在伊雒天子不能治諸侯不能驅

而夷狄得以伐之中國不振甚矣

程端學本義

昭十七年秋晉荀吳帥師滅陸渾之戎

左傳見書滅門○陸渾之戎本居秦晉西北在荒服外自僖二

十二年晉與秦遷之伊川侵逼王畿則晉秦之罪也今晉與楚

爭疆掩其不備而滅之不足以贖前過矣

汪克寬纂疏

○前書楚子

之伐今書晉卿之滅皆以治其兵逼郊甸之罪

御纂直解

○秦穆

晉惠不鑿驪山之禍而遷戎於伊川逼近王都自楚莊伐陸渾

遂服於楚苟吳掩取其國非爲王室也以貳於楚耳亦非爲貳楚也貪其地耳且始則敢以祭雒三塗欺王又不獻功於王罪不勝誅矣

美炳璋讀左補義

○戎非侵敗王略徒以貳楚故而震驚郊

甸厥罪大矣

郝懿行說畧

揚拒泉臯伊雒之戎

僖十一年傳杜注揚拒泉臯皆戎邑及諸雒戎居伊水雒水之間者今伊闕北有泉亭孔疏河南雒陽縣西南有戎城顧曰今河南府洛陽縣西南有前城卽泉戎地

顧棟高

僖十二年

傳戎伐京師王子帶召之也秦晉伐戎以救周晉侯平戎于王

按伊雒之戎與陸渾地略相近觀此年傳所云則知此戎種類繁夥爲禍最暴難以齊桓創伯僅使管仲平戎于王室其驚悍難御可知故二十二年秦晉卽遷陸渾之戎于伊川意必以藩

衛王室爲名用蠻夷以制蠻夷也卒之果得其用伊雒之戎就
衰旋服于晉文八年就趙盾之盟于暴成六年且受命侵宋蓋
得陸渾牽制之力爲多故楚莊欲窺王室而先伐陸渾晉荀吳
欲滅陸渾而先有事三塗居然爲王室之藩籬矣顧棟高○五伯

桓公爲盛而周室戎狄之禍自若王子帶以戎伐周桓公不能

討豈以受子帶之奔爲此姑息邪金履祥通鑑前編

僖十二年傳王以戎難故討王子帶秋王子帶奔齊冬齊侯使管夷吾平戎于王使隰朋平戎于晉

杜注前年晉救周伐戎故戎與周晉不和

僖十三年秋會于鹹傳謀王室也爲戎難故諸侯成周齊仲孫湫致之

僖十六年傳王以戎難告于齊齊徵諸侯而戍周

杜注自十一年戎伐京師以來遂爲王室難

文八年冬公子遂會雒戎盟于暴公羊作伊每戎

傳襄仲會晉趙孟盟衡雍遂會伊雒之戎杜注戎將伐魯故與

盟○雒邑天地之中而戎醜居之亂華甚矣胡傳○成周伊雒之

地戎居之故惡而書之黃仲炎通說○是時伊雒之戎猶橫魯亦畏

之故汲汲與盟然既盟遂不復來伐已得以禮法羈縻矣顧棟高

成六年 傳晉伯宗衛孫良夫鄭人伊雒之戎陸渾蠻氏侵宋

按此時伊雒之戎已馴服矣後昭二十二年子朝之亂王師敗

績于前城服虔日前讀爲泉卽泉戎地蓋已入爲王城邑其滅

之年則不可考顧棟高

蠻氏C一名茅戎○一名戎蠻子

成六年傳蠻氏昭十六年戎蠻子注攷見小國門茅戎見下

文十七年 傳周甘歌敗戎于邠垂

杜注邠垂周地河南新城縣北有垂亭顧曰今爲汝州伊陽縣

地劉昭後漢志以爲此蠻氏之戎也

成元年秋王師敗績于茅戎

公穀作賈戎

傳晉侯使瑕嘉平戎於王單襄公如晉拜成劉康公徼戎將遂
伐之叔服諫不聽敗績于徐吾氏顧曰按杜注云平戎平文十
七年邠垂之怨合之後漢志則此卽爲蠻氏之戎明矣水經注
大陽縣有茅亭故茅戎邑括地志茅戎在河北縣西二十里以
處晉之茅津得名其地當在今山西解州之平陸且連亘河南
汝州之境疆域頗不狹又近在肘腋而甘歎乘其飲酒劉康公
又徼其無備以用兵爲兒戲執政大臣如此何以立國宜王靈
之不振也

顧棟高○杜注徐吾氏茅戎之別也孔疏茅戎是戎內之別徐吾又是茅戎內聚落之名王師與茅戎戰

處

○茅戎搜王室當率諸侯正其罪何可言平平者和解之謂

自桓文以來皆言平戎于王而不知其非也

姜炳璋讀左補義

○王氏

稗疏謂茅戎是在邠垂非在茅津見土地門

成六年

傳伊雒之戎陸渾蠻氏從晉長宋

見前○顧曰時蠻氏屬于晉

襄五年

傳王使王叔陳生惣戎于晉

顧曰卽蠻氏之戎

昭十六年春楚子誘戎蠻子殺之

戎蠻注見前○孔疏杜言河南新城縣東南有蠻城則是內地之戎在楚北也戎是種號蠻是國名子爵也○左傳楚子聞蠻氏之亂也與蠻子之無質也誘戎蠻子嘉殺之遂取蠻氏既而復立其子焉注質信也○戎蠻戎之別種其稱戎猶赤狄之有潞氏甲氏邢吁舒之有舒蓼舒庸舒鳩也戎蠻既稱子則安王化而從晉伯者也特以地在申葉許鄭之西而南界楚之白羽故楚

誘殺之左氏謂以蠻子無質豈非爲其從晉乎誘而後殺不易

屈也

余光存侯

○公羊作戎曼子郡國志引左傳作鄢子

陳樹華改正

哀四年夏晉人執戎蠻子赤歸于楚

左傳家氏說見書執門○今河南陝州盧氏縣有晉陰地故城

爲晉命大夫屯戍之所高氏曰梁本周邑時爲蠻氏所據後屬

楚謂之南梁

顧棟高

○自後戎種在中國者盡矣獨無終以請和

於晉得存

又

犬戎

閔二年傳杜注犬戎西戎別在中國者○顧曰在今陝西鳳翔府境

○又曰按犬戎卽周之獫狁也史記匈奴傳西伯伐畎夷氏穆王伐

犬戎幽王時申侯與犬戎共攻殺幽王子驪山之下遂取周之焦穫

而居涇渭之間晉文侯秦襄公救周逐出之其遺種在中國者尙居

渭濱閔二年虢公敗犬戎于渭汭其遺種也本與山戎及陸渾各爲一族其地亦各殊史公混諸戎而一之并混戎狄而一之踈矣顧棟高

閔二年

傳虢公敗犬戎于渭汭

顧曰渭汭乃渭水入河處虢之西境在今陝西同州府華陰縣

僖二年

傳虢公敗戎于桑田

杜注桑田號地在宏農陝縣東北○顧曰桑田地後入于晉

驪戎

莊二十八年傳杜注驪戎在京兆新豐縣其君姬姓其爵男也○顧曰今陝西西安府臨潼縣東二十四里有驪戎城

莊二十八年

傳晉伐驪戎驪戎男女以驪姬

按國語云晉伐驪戎不詳何年而史記表稱在獻公之五年爲魯莊公之二十二年其地則入于秦爲侯麗地麗與驪通成十

三年晉及諸侯之師伐秦濟涇及侯麗而還卽故驪戎國也其地一日櫟陽史記秦獻公二年徙都櫟陽在臨潼縣北三十里卽侯麗故地其出晉入秦之年則不可考

顧棟高

○書狄

伐衛盟邢稱人進狄辨辨長狄非國號辨

晉敗狄貶人辨

敗鹹公說赤白狄辨

史記晉文公接戎翟居於河西圖洛之間號赤翟白翟杜註亦云白狄在晉西此因左傳白狄與秦同州而爲是說耳以愚考之狄之見於傳不一均在晉東與西無預潞氏在今山西潞安府皋落氏則在今平陽府垣曲縣鮮虞在直隸真定府肥在藁城縣西南鼓在今晉州晉之滅潞也荀林父敗赤狄于曲梁曲梁爲今廣平府永年縣蓋反出其東而轉攻之則卽一路氏而疆域之廣亘千有餘里且閔僖之世狄滅邢滅衛滅溫伐齊伐魯伐鄭伐晉并蹂躪王室藉非境壤相接何以能爲患至此則自山西以迄直隸河南直接山東之境皆

其所出沒特其俗不城郭就山野廬帳而居莫能指名其何處耳且又遷徙無常傳曰狄之廣莫於晉爲都蓋指蒲與屈言蒲屈爲今山西之隰州吉州以後漸東徙晉重耳之適諸國也先奔狄而後適衛適齊境道顯然狄在晉東可知矣征南得無爲史記所誤乎

顧棟高

春秋之世有赤狄白狄又有長狄長狄兄弟三人無種類而赤狄白狄種類最繁案經傳所見赤狄之種有六曰東山臯落氏曰磨咎如曰潞氏曰甲氏曰畱吁曰鐸辰白狄之種有三曰鮮虞曰肥曰鼓然以予考之閔僖之世狄尤橫其時止稱狄未有赤白之號蓋當時之單以狄舉者皆赤狄也赤狄最强能以威力役其種類白狄故居河西其別種在中國者赤狄能役屬之而長狄尤其酋豪中之魁異者合諸部爲一力大勢盛故能以兵威伐邢入衛滅溫伐周又能仗義執言救齊伐衛以齊晉之強莫之能抗也其疆域自晉蒲屈以東東

與齊魯衛爲界蓋自平陽潞安以及山東之境雜居山谷縣地千里故當日邢衛宋魯齊晉諸國胥被其患逮魯僖公之三十二年而狄始亂明年伐晉而白狄子見獲蓋其種類自相攜貳各分部曲如甸奴之分五單于勢分力弱自是而赤狄白狄紛然見經而狄於以不競矣論者謂長狄白狄之各爲一國非也蓋其初皆屬于赤狄後稍稍離異始以名見於春秋文宣之世威令不行四出侵伐屢見挫衄經書晉侯敗狄于箕卻缺獲白狄子叔孫得臣敗狄于鹹獲長狄僑如皆狄之將佐後僑如子弟焚如與潞俱滅則狄之死國難者春秋賤之故不書使不得與潞子嬰兒等則其種之貴賤可知矣綜而計之莊公三十二年而狄伐邢暴橫中國更三十有四年而狄有亂赤狄白狄始分又三十有五年而赤狄潞氏滅于晉又六十有五年而晉滅肥又十年而晉滅鼓白狄止存鮮虞首尾百四十有四年之

間盛衰強弱之故豈不較然也哉晉里克之逐狄也曰懼之而已無
速衆狄則當狄之合狄之所以盛也卻成子之求成于狄也衆狄疾
赤狄之役遂求成于晉則當狄之分狄之所以衰也春秋始書狄而
後書赤狄白狄者蓋因列國之赴告與狄之自通于中國者而書之
皆當時之實錄也杜氏於呂相絕秦以白狄爲晉婚姻謂赤狄之女
白狄伐之以納於文公其意似以虜咎如爲赤狄而重耳所奔爲白
狄此出於臆見無可考據虜咎如之女爲叔隗季隗而狄女亦稱隗
后則本爲一姓當時之止稱狄者皆係赤狄無疑也

又

狄北方之鹵國于太原府北故太原一名大鹵其族類各爲部落在
太原者爲部落長名曰狄迤西爲白狄與秦境迤南爲赤狄西與晉
境東與衛邢境南與周溫境迤東爲白狄之鮮虞肥鼓與齊晉境而
入春秋侵伐入滅統書曰狄者以諸部落皆爲之屬如晉敗狄于箕

而獲白狄子其證也自僖三十二年狄亂諸部落始各相雄長而狄分矣於是赤狄白狄並見赤狄始宣三年其後師競已甚不數年而滅于晉盡其種類赤狄以亡白狄尙秦患晉始宣八年至襄十八年來朝後無聞而晉滅肥滅鼓伐鮮虞終春秋在北境者惟鮮虞存入七國改號中山滅于趙白狄以亡狄既失諸部落其勢日衰及昭元年晉荀吳敗狄大鹵而履北庭遂不見經亦服屬于晉焉至長狄本漆姓在夏爲防風氏在殷爲汪芒氏在周爲鄭瞞非狄種而寄于羣狄形長名曰長狄觀左傳所載諸國之獲長狄亦亡

高澗然釋經卷三

春秋之世狄戎俱爲中國患然狄重而戎輕戎之類有山戎有姜戎雖戎而獨名戎者爲最強狄之類有赤狄白狄長狄而獨名狄者亦最強狄比諸戎性尤悍鷙戎雖侵暴中國其強易弱狄人敢於滅國當齊桓之亡與聞中國之政不但侵暴而已然嘗考之經狄患莫甚

於僖文之世齊之初伯嘗謀邢謀衛自是數十年間嘗置夷狄於不問晉之盛時亦不過敗狄于箕一役未幾一二世以後乃累治狄而不置何邪縱狄若齊桓亦無損於伯業之盛治狄如晉人適足以見伯業之衰蓋嘗論之齊自桓公數年經營以免邢衛於難也會禮以束荆患方張衆志未固方將并謀畢力改北轍而南向以圖帕荆之功召陵聽命而諸侯已勤矣是猶門戶之寇旣悉力以去之蓋籬之侮苟幸其不至於爲患蓋亦小安焉以休吾室內之人此齊桓之謀國能不強其力之所難爲管仲之相君能度其德之所能舉故縱敵不問而卒無損於伯業之盛晉自景公君臣不相聽以致邲之敗也平邱以降諸侯盡離伯業大失於是含垢忍恥閉南關而北出以尋治狄之忿狄雖大創而晉之威重益墮矣此皆伯宗荀伯之謬欲文其喪敗削弱之詬韓范諸臣之專欲行其厚自封殖之謀雖治狄不

置適以見其伯業之衰雖然春秋之世諸侯蒙狄之患者凡八國當齊桓之盛猶所不免而自魯襄以後咸無聞焉晉人翦除之力亦豈可掩哉惟其舍內以事外是以君子無取焉耳

李琪列國世紀

狄蓋多種綿亘北方入春秋來世爲諸夏之患東則齊當其衝南則鄭當其衝東南則界衛西南則界晉一盛於莊閔之際而齊桓公救邢衛以攘之再盛於僖文之際而晉襄公敗箕以創之中國有霸狄所憚也齊桓衰而狄熾則救齊以伐衛黨叔帶以伐周問晉文有鄭虞以侵齊乘衛成初歸國以圍衛四十年間橫行中國未嘗稍挫也晉襄沒而狄逞則侵齊而又越齊以及魯伐衛而又越衛以及宋僑如之獲春秋大之然止能殄其一種而未能滅其族類也及宣公之世狄勢亦分蓋衆狄之中赤狄最彊而赤狄之中潞氏爲大比歲侵齊晉人懼焉攢函之會先離其黨問鄆舒之不臣因滅潞而有其土

次及甲氏留吁之屬無俾遺種晉景之於赤狄能殲其類矣雖然非定潞氏實利之焉蹊田奪牛能免譏乎於斯時也楚莊肆虐未人告急不能出師以爭諸侯而沾沾赤狄以逞其志則晉之不競於楚也

豈無故而然

馬驥左傳事緯

齊晉之伯先制戎狄而後爲盟主然戎猶散處四方而狄則獨疆北野入春秋來所病者八國而僖文之際尤狄人不逞之會也自晉襄敗狄于箕晉國之狄禍稍息然齊宋魯衛日受狄患史不絕書迨宣公之世狄勢始分赤狄白狄並見於經赤狄之種有潞甲留吁白狄之種有肥鼓鮮虞赤狄盛而晉用白狄赤狄滅而晉難白狄白狄見赤狄之滅知爲晉始故同秦伐晉交剛一敗狄用惕息而大鹵再戰狄創益深厲平兩勝以來狄之要害在晉度內祝駝所謂疆以戎索

第談所謂戎狄與鄰者至此其地多晉有矣

馬驥左傳事緯

白狄有二有在晉之東者昭十二年注所謂鮮虞白狄別種是也有
在晉之西者成十三年所謂白狄及君同州是也陸隴其二三
魚堂贖言

赤狄

其別有六曰東山臯落氏曰盧罔
如曰潞氏曰甲氏曰留吁曰鐸辰

莊三十二年冬狄伐邢狄始見經閔元年春齊人救邢

顧曰按自宣十五年以前凡單以狄舉者皆赤狄也

無傳○狄前此未見於經然自伐邢而滅衛三年之間塗炭兩

國首以伐書著其強也

張洽
集注

○狄始見於春秋而伐邢入衛故

齊桓翊霸之功不可沒也

日講
解義

閔二年冬狄入衛

惠王十七年衛懿公及赤狄戰于洞澤

竹書
紀年

又

傳言侯使太子申生伐東山臯落氏

杜注赤狄別種臯落其氏族顧曰在今山西平陽府垣曲縣

信元年夏邢遷于夷儀齊師宋師曹師城邢

信二年春城楚邱

封衛

信八年夏狄伐晉

左七年晉里克敗狄于采桑梁由靡曰狄無恥從之必大克里克曰懼之而已無速衆狄號射曰期年狄必至示之弱矣夏狄伐晉報采桑之役也○狄伐邢齊救而城之狄入衛齊徒而封之今狄伐晉齊桓不問何也蓋自齊之伯晉未嘗一窺諸侯之壇坫蓋自以爲畿北之巨藩不屈於齊齊亦視之蔑如也

趙鵬

○齊存邢衛不能挫狄故狄無所忌春秋惜之

吳敦纂言

僖十年春秋滅溫溫子奔衛

左傳杜注見書滅門○王靈不振畿內諸侯狄得滅之此天王出居鄭之權輿也

張洽集注

○狄伐邢入衛伐晉滅溫而齊桓不問

葵邱之會矜心日生於此有不克終之漸矣

趙鵬飛經筵

○齊桓雖

存邢衛而不加兵於狄蓋其時方急圖楚故未暇及狄狄因此

愈肆前年敢伐大國之晉今又敢滅畿內之溫豈特王靈之不

振抑亦伯圖之有闕也

吳激纂言

○滅溫而齊不救此侵衛之兵所

由來也徒城楚邱之郛以備之適多見其怯耳

朱朝瑛畧記

僖十二年

傳春諸侯城衛楚邱之郛懼狄難也杜注爲明年狄侵衛傳

僖十三年春秋侵衛

前年狄滅溫溫子奔衛今狄侵衛以衛納溫子也齊桓坐視而

不救失其職矣

趙鵬飛經筵

○自城楚邱後狄不敢窺衛者十餘年

至是復侵其後屢爲患桓霸衰矣

戴溪講義

僖十四年秋狄侵鄭

狄至是復侵鄭甚矣而不討桓公之伯心怠哉

趙鵬飛經筵

○狄在

西北侵衛而至於鄭幾與楚合矣鄭天下之中也楚禍南至狄

禍北來楚狄交橫而齊不一救桓之志不在諸侯也

直解 御纂

僖十六年 傳狄狄侵晉取孤厨受舞涉汾及昆吾

僖十八年夏狄救齊

齊桓公卒宋襄伐齊納孝公殺無虧狄救四公子之徒○桓攘

服夷狄能以恩信結其心觀狄之救楚之盟見公遺烈

呂本中集解引

翰○狄在齊桓之世伐邢入衛滅溫侵鄭桓伐戎伐楚而於狄

盤踞肆伐曾不興師問罪養狄爲患故狄感其惠而救之也不

然桓生而狄不向化桓死而狄能扶義哉

張自超宗朱辨義

又 冬邢人狄人伐衛

左伐衛圍菟園衛侯以國讓其父兄子弟及朝衆曰苟能治之

燬請從焉衆不可而後師於訾婁狄師還○狄稱人見夷狄稱

人便文門○穀梁謂伐衛以救齊夫救齊不伐宋而伐衛乎自
城楚邱而後狄不得逞志于衛久矣今齊桓既沒狄方圖一逞
而衛又與之以隙所以狡焉肆志

朱朝瑛
畧記

僖二十年秋齊人狄人盟于邢

左爲邢謀衛難也於是衛方病邢○齊桓襄狄封邢衛桓甫歿
而衛卽從宋伐齊邢狄救齊伐衛衛卽病邢齊狄復爲邢謀衛
難春秋詳書不殺蓋深慨宋襄之失道急望晉文之嗣興也以
爲進狄書人非聖人之旨顧棟高○吳氏說見夷狄稱人便文門
僖二十一年春秋侵衛

爲邢故

杜注

○因邢之盟也

張洽集注

○狄因宋衛伐齊喪仗義救齊

又與邢協力伐衛衛因病邢狄又援齊以爲邢謀至此遂爲邢
侵衛夫宋襄圖伯而反使狄居仗義之名衛文中興而乃於齊

冒背德之罪中國顛倒如此春秋安得不望晉文之出乎顧棟高

僖二十四年夏狄伐鄭 冬天王出居于鄭

左鄭之入滑也滑人聽命師還又卽衛鄭公子士洩堵俞彌帥師伐滑王使伯服游孫伯如鄭請滑鄭執二子王怒以狄伐鄭富辰諫弗聽使顏叔桃子出狄師狄伐鄭取櫟王德狄人將以其女爲后富辰諫又弗聽甘昭公通于隗氏王替隗氏顏叔桃子曰我實使狄狄其怨我奉太叔以狄師攻王王遂出秋顏叔桃子奉太叔以狄師伐周大敗周師王出適鄭處於汜○鄭執王使王啟狄師天下何恃不亂張洽集注引許翰○伐鄭者伐周之兆也可言伐鄭不可言伐周溫在河之陽南望卽鄭虎牢西望卽周洛汭故狄滅溫周鄭之患也羅喻義野編○朱氏說見書伐門

僖二十五年 傳晉侯納王

狄人奉臣伐君致天子播越其罪大矣晉侯宣聲其罪帥六師臨之其功高於城濮十倍乃以久依狄人之故隱忍不發誅子帶而有狄顧私恩而虧大義故夫子削而不錄事不見經

顧棟高

僖三十年夏狄侵齊

左晉侵鄭狄間晉之有鄭虞也侵齊○狄自背其盟也齊桓召

陵之後書狄侵晉晉文城濮之後書狄侵齊狄之輒敢陵侮如

此而二伯不攘斥之

高閔集注

○晉文置狄不問以狄無僭王圖大

之心而楚之志不在小也

家鉉翁詳說

○會溫以圍許而許不服

入盟翟泉謀伐鄭而鄭不畏

九年今則狄敢於乘間而侵齊晉

文伯業衰矣

吳澂纂言

○狄在齊桓之世肆虐諸侯而桓不之問桓

卒而救齊伐衛是必桓有德於狄也纔十餘年而晉文繼伯狄

卽侵害及齊自此屢侵不已是又間齊之不競也而皆無忌於

二公之伯狄真不道矣

張自超宗朱辨義

○胡傳見比事門

僖三十一年冬狄圍衛衛遷于帝邱

狄去年侵齊今又圍衛若無晉霸然蓋以晉文居狄之久而狎

之欺

吳澂纂言

○狄侵齊晉不能討故圍衛狄圍衛晉不能救故衛

避狄遷都

李明復集義引謝湜

僖三十二年夏衛人侵狄衛人及狄盟

左狄有亂衛人侵狄狄請盟○衛三十年間國再遷亦微弱矣

一旦狄有內亂侵之而請平自是北鄙不聳

家鉉翁詳說

○衛迫于

狄遷國以避宜內修德政外結隣援養力積威以聲其罪而伐

之乃忿不思懲乘亂以起僅僅侵之而又屈已及之盟保境息

民之道修怨復仇之道胥失之矣

張自超宗朱辨義

○案左傳狄有亂

三字最宜着眼看自是赤白狄分號令不一狄亦浸微自閔元

年至此狄之橫於中國三十四年矣是年冬晉文公卒

碩棟高

僖三十三年夏狄侵齊

左因晉喪也○三十年狄侵齊傳以爲聞晉之有鄭虞此年狄侵齊傳以爲因晉喪狄之所以敢侵齊者聞晉之虞因晉之喪則狄未嘗無畏晉之心也晉縱狄而莫之攘是爲可罪焉爾

吳

言○狄因晉間輒出侵齊自是秋有箕之敗然後狄師三年不

敢出乃秦與晉交兵三年四戰由是狄侵齊魯楚滅江六而伯

政遂弛則皆秦爲之撓也

彙纂案

○狄再侵齊矣不見齊有以報

之而春秋於此後屢侵皆書者著狄之無懼於諸侯

張自起宗未辨義

又 秋晉人敗狄于箕

左狄伐晉及箕晉侯敗狄于箕卻缺獲白狄子○箕見晉地門

○狄自伐邢之後至是垂四十年諸侯無大小皆受其毒不敢

以一矢加之前年衛不忍其虐而侵之狄屈而求盟焉今又侵齊伐晉封豕長蛇乘隙而動非掃其巢穴殆未已也侵齊而齊不能討侵晉晉敗之故其後屢侵齊而不敢犯晉則知制夷狄果不可以示怯也

趙鵬飛經笥

○自三十年狄始侵齊而晉未暇討

自是中國歲有狄患敗於此而後懲艾不復犯畧是故戎狄之亂不震疊以威武未易以德懷也

呂本中集解引許翰

○侵齊圍衛晉已

有不救之愆此時竟來撻晉安得不以兵應之春秋不必貶晉侯而人之也陳氏據左傳晉侯敗狄之說謂貶晉侯而病晉夫晉侯方在喪於秦則強敵大戰伯業興衰所關墨經卽戎事或有之於狄則大夫將兵可以相敵矣何必身在戎行哉

張自超宗朱

義○自僖三十年以來狄連歲爲中國患侵齊伐衛今竟敢於伐晉且深入至箕使非晉襄此舉狄禍其未有艾乎

顧棟高○此

強甚矣中原無不受毒且助叔帶以伐天王桓文不能加以一矢也今晉敗之其後狄遂震誓此一役也繼桓文之業有功於

天下者大

姜桓璋賈左補義

文四年夏狄侵齊

大國如齊狄侵者四則其他邢衛魯鄭不足怪也

注克寬纂疏引王侯

狄自箕之敗至是始復侵齊以晉襄無攘卻之謀而齊伯不紹

故也

又注克寬

○狄間晉有秦楚之難也

呂本中集解引許翰

文七年夏狄侵我西鄙

左公使告于晉趙宣子使因賈季問鄆舒且讓之○狄懲箕之

敗四年間一侵齊而未敢肆至是復侵魯侵齊侵宋侵衛晉襄

既沒莫之忌矣

呂本中集解引許翰

○間秦晉之爭也

張洽集注

○魯有戎患

未嘗有狄患狄蓋遠於魯今越齊衛而侵魯其患深矣

趙鵬飛經案

○狄在僖公時肆虐於諸侯齊晉衛鄭諸大國無不被其毒者而衛至兩遷其都晉雖一敗之于箕而未創也獨不見肆志于魯則魯人頌僖公所云是膺是懲者亦必有撫馭抑制之實矣至此而來侵毋亦失先公所以治之之道邪張自超宗朱辨義○案宣十五年晉滅赤狄潞氏傳云鄆舒爲政此傳云云知此狄之爲赤狄明矣晉襄既沒秦晉交爭故狄肆其侵暴也高櫟

文九年夏狄侵齊

狄不侵齊五年矣復肆其橫乘楚之得氣也書以病晉高閏張治集注

文十年冬狄侵宋

狄侵諸大國獨宋未爾今復侵宋者以宋昭公之亂未定也高閏集注

文十一年秋狄侵齊

十餘年間狄四侵齊其強如此所以大鹹之功也高閏集注

又冬叔孫得臣敗狄于鹹

左郟瞞侵齊遂伐我公使叔孫得臣追之敗狄于鹹獲長狄僑如。直云狄舉狄軍總敗也如穀梁說止敗一人則當云敗長

狄于鹹也

陸道辨疑引趙匡

○狄之中有長身者故號之曰長狄長狄

卽狄也非別有一種名長狄

吳澄纂言

○傳先言敗狄後言獲長狄

僑如蓋以長狄爲狄中一人非以長狄爲國號也

纂纂案

○此狄

是赤狄下言獲長狄僑如猶言獲宋華元獲陳夏鬻俘獲之將

佐爾經不書者以夷狄故略之也長狄爲狄中一人非國號

纂說是

顧棟高

○鄭瞞者狄之種名猶後世之部落云爾僑如等

則其酋長云爾公穀皆以爲敗一人穀梁又謂不言獲爲內諱

豎儒鄙陋至此

陶正靖春秋說

○狄自僖之末侵陵列國至晉敗之于

箕其後侵齊魯宋而不敢犯晉敗之之力也今八年之間三侵

齊而侵魯宋者各一其可不有以制之哉此敗之後蓋有懼心

惟十三年一侵衛而已不敢窺齊魯之藩籬也則鹹之役不惟

有功於魯且有功於天下不可不錄趙鵬飛經筵 ○晉敗狄于箕其

後不敢復犯晉魯敗狄于鹹不敢復犯齊魯立國貴自強也苞方

直 ○狄侵伐諸侯桓文之時不少降服晉襄敗之于箕而未肯

輯也自敗鹹之後但一侵衛而不復加兵於諸侯矣其後晉人

敗之于交剛又敗之于大鹵而狄患息春秋不書矣使桓文早

為攘狄之謀何至數十年間流毒若此哉張自超宗朱辨義

文十三年冬狄侵衛

狄自敗鹹銳鋒頓挫今復侵衛者以衛迫于狄成公方會魯于

杏乘虛侵之狄之窺伺其可忽乎趙鵬飛經筵 ○書以病晉日講解義

宣三年秋赤狄侵齊赤狄始見經

狄忽分爲二不相統一有向衰之漸春秋著赤狄白狄之號其

後晉滅赤狄因其分也

家範翁詳說

○謂之赤狄白狄俗尚赤衣白

衣也地譜洛州春秋赤狄之地

張洽集注

○赤狄別爲一種在山西

潞州以北而東界黎城卽古黎國也其種有潞氏甲氏留吁壤

地相連者也距齊甚遠今侵齊始見於經

余光存侯

○赤狄在潞州

北近晉而遠於齊忽舉侵齊之師知晉之無能爲也楚橫於南

狄擾於北以中國無霸耳

日蘭解義

○狄自入春秋止書狄蓋舉

北方引弓之人合而爲一也卽狄有亂以後箕之役白狄見矣

而以狄冠之白狄猶爲之屬也至是顯然分國爲二其自通於

中國加一赤字之號而白狄亦以八年偕晉伐秦自爲盟會征

伐不復就赤狄之役矣此匈奴分爲南北單于之始也

顧棟高

宣四年夏赤狄侵齊

以齊之強狄連歲侵之齊無政而中國無伯具見

直解

○齊

五受狄侵不能卻至此赤狄又侵之齊惠不能於其國可知自

起宗朱辨義

○狄是時四出侵伐號令不一此狄之衰微也

願棟高

宣六年

傳秋赤狄伐晉圍欒及邢邱晉侯欲伐之中行桓子曰使疾其民以盈其貢將可殲也

宣七年

傳秋赤狄侵晉取向陰之禾杜注晉用桓子謀故縱狄

宣十五年夏晉師滅赤狄潞氏以潞子嬰兒歸

左荀林父敗赤狄於曲梁滅潞晉侯治兵于稷以畧狄土立黎

侯而還獻俘于周

又見書滅門

○杜注潞氏子爵孔疏潞是國名赤

狄之內別種○莊僖之世狄爲中國患晉敗之於箕魯敗之於

鹹而後狄之患衰狄衰而赤狄興焉三年侵齊四年復侵齊其

患浸及於諸侯矣晉景滅之終春秋之世諸侯不復有狄患

趙

飛經

○公羊曰潞何以稱子潞子之爲善也躬足以亡爾非也

稱子周禮也非爲善而亡也傳意以稱子是褒不知爵自當子
非以賢進之也豈有國滅身虜而得爲賢者哉劉敞權衡○傳意拘

於國不若氏氏不若名名不若字字不若子之例故前見潞稱

潞氏謂之進今見稱潞子謂之又進不知子者爵所當稱也有

爵者則以爵通無爵者則不以爵通故甲氏不言子不然甲氏

又何善而得氏乎兼夢得公羊傳○赤狄種類不一僅稱潞氏不知

爲赤狄僅稱赤狄無以別甲氏留吁故詳之其稱氏者本國之

號如英氏甲氏臯落氏潞子戎蠻子書爵者君虜君奔並從告

終辭書名書爵二國書子固周之舊封也高誘然釋經○潞氏今潞

安府潞城縣黎今潞安府長治縣西有黎侯亭曲梁故城在直

隸廣平府永年縣東北顧棟高

宣十六年春晉人滅赤狄甲氏及留吁

左士會帥師滅赤狄甲氏及留吁鐸辰三月獻狄俘○杜注見

小國門○何休曰言及者留吁行微不進非也言甲氏留吁則

似一國故以及絕之爲二國也又氏者所以配甲也非爲行進

也支固不可曰晉人滅赤狄甲及留吁又不可曰晉師滅赤狄

潞以潞子嬰兒歸故以氏足之爾公羊乃謂國不若氏非通論

也劉敞○甲氏者潞之餘種留吁其殘邑也前此楚人圍宋晉

坐視不救於潞氏甲氏則窮搜不已且橫函之會無幾時而滅

狄者三蔑德棄信何以宗諸侯日講○十一年之盟衆狄此

等俱不在內以其爲赤狄類故必殄滅之而後已知前日所

盟者白狄也十一年會狄于橫函○彙纂注案胡氏注留吁赤

狄之殘邑晉滅赤狄甲氏留吁遂爲晉邑謂之純留鐸辰杜注

留吁之屬也○鐸辰同滅何以不書屬留吁也不書以歸死國

也高澍然

釋經 ○昔者聖王之待夷狄蓋有道矣於其來也接之而

不傷義於其叛也討之而不傷仁肅慎來賀王命誦之無過禮

也故曰接之而不傷義薄伐獫狁至於太原不窺邊也故曰討

之而不傷仁春秋霸者異此方其致夷狄之親附則屈意奉承

周旋無間如晉侯會狄于欒函是也及乘其衰亂則窮追深入

殄滅無遺如晉師滅赤狄潞氏晉人滅赤狄甲氏及留吁是也

斯二者皆非待夷狄之道故春秋書之爲戒也

黃仲奕通說

成三年秋晉卻克衛孫良夫伐麇咎如

左討赤狄之餘焉麇咎如潰○杜注麇咎如赤狄別種潞氏餘

民散入麇咎如故討之○是年赤狄之種盡絕顧棟高

白狄其別有三曰鮮虞曰肥曰鼓

僖三十三年 傳卻缺獲白狄子 白狄始見傳

杜注見小國門○凡單稱狄者皆赤狄也白狄其將佐爾顧棟高

宣八年夏晉師白狄伐秦白狄始見經

左白狄及晉平夏會晉伐秦○此時白狄知赤狄之將亡而欲

結晉以自固也顧棟高

宣十一年秋晉侯會狄于橫函

左卻成子求成于衆狄衆狄疾赤狄之役遂服于晉杜注赤狄

故服役會于橫函衆狄服也○杜注晉侯往會之故以狄爲會

主橫函狄地○先王之待戎虜急其悍而緩其馴故戎虜之困

必託命中國以求息肩之地晉卻成子之論其有見於此矣衆

狄附晉之始諸大夫侈然驕溢諱一動之勞乃欲坐而召狄卻

成子獨知馭戎虜之道不可恃其馴而煩其責遂以能勤有繼

之說曉警諸大夫次於橫函以會衆狄屈已而不勞彼終得衆

狄歡心

呂祖謙左氏傳議

○狄自晉敗諸箕稍知警戒今乃會之何哉

伯主縱不能攘獨可會乎誠使狄人知懼請成于晉猶可言也

今晉乃求成于衆狄其辱甚矣

戴溪謂義

○案此云衆狄專係白狄

之種類若鮮虞肥鼓之屬是也晉侯親在會蓋欲攜赤狄之黨以絕其援至十五年遂滅潞氏益知前日之合而今日之分也

僖公初年當狄之初起里克曰懼之而已無速衆狄蓋此時合

諸部爲一力大勢盛遂無敵于天下也

顧棟高

成九年冬秦人白狄伐晉

左諸侯貳故○經所謹者華夷之辨也晉嘗與狄伐秦秦亦與

狄伐晉中國友邦目相侵伐已爲不義又與夷狄共焉不亦甚

乎

胡傳

○秦召楚與狄伐晉故十二年晉敗狄而卽伐秦

顧棟高

成十二年秋晉人敗狄于交剛

左狄人周宋之盟以侵晉而不設備晉人敗狄于交剛○此狄

蓋白狄也九年秦人白狄伐晉此先敗狄而後伐秦是知報九

年之役也

高閏集注

○不自彊於政治以攘爭霸之楚而區區釋憾

於羣狄所爭細矣

日講解義

○宣成之世晉每有事於狄夫欲圖

伯當先攘楚雖秦猶宜置之况狄乎故書以譏之

直解律案

○案

是時赤狄之種盡絕故中國直名白狄爲狄不復別之如赤狄

之在閔僖之世也

顧棟高

○張氏說見上地名門

襄十八年春白狄來

左白狄始來杜注不言朝不能行朝禮○春秋書白狄於是止

白狄之來與介葛盧同

高閏集注

○戎狄與之會盟則有譏若慕義

而來則容而接之亦非不可惟謹所以待之之道而已

直解

襄二十八年

傳白狄與諸侯朝于晉宋之盟故也

顧曰是時白狄屬楚

昭元年夏晉荀吳帥師敗狄于大鹵

左中行穆子敗無終及羣狄于太原崇卒也

詳載外兵
敗某門

○僖文

之世齊宋魯衛皆罹狄害文十一年魯敗之于鹹成十二年晉敗之于交剛其害遂息今諸侯未受其患而荀吳敗之于大鹵

大鹵卽太原在晉之東北無乃爲晉邊鄙之患而晉敗之歟十

六年吳又伐鮮虞十七年復滅陸渾則吳亦好武功者也

趙鵬
飛經

荃○晉自悼公以來狄師不出書敗狄至是再見晉彌衰也悼

之伯也魏絳諫曰勞師于戎而楚伐陳必弗能救是棄陳也諸

華必叛戎禽獸也獲戎失華毋乃不可乎悼公卒復有事于戎

狄矣

陳傳良
後傳

○晉旣委諸侯於楚而又有事於狄此楚圍所以

得假討賊之名以并吞陳蔡與

日講
解義

○趙武甘爲楚役而荀

吳魏舒各樹戰功爲己封殖故大鹵之役雖亦攘夷狄之一端然知晉之無意於楚也又見晉非無攘楚之人而甘受屈於楚也

姜炳璋讀左補義

○晉屢敗狄之後狄益弱矣比年未有侵伐諸侯

之事而晉敗之是晉因楚弭兵而有事於狄也

張自超宗朱辨義

○傳

言羣狄卽所云衆狄蓋白狄也宣十一年卻缺求成于衆狄以攜赤狄之黨遂滅潞氏是後役于晉從晉伐秦中間爲秦所誘而有交剛之敗其禍遂息閱四十二年復牽率無終以伐晉無終今直隸薊州在太原東北二千餘里且曾與晉和今羣狄敢爲構煽爲患邊鄙宜其啟晉雄心而有肥鼓之滅也

顧棟高 ○晉

攘狄薄其都城而狄自是不見經蓋服屬於晉矣

高樹然釋經

昭十二年

傳晉荀吳僞會齊師者假道于鮮虞遂入昔陽狄滅肥

又 冬晉伐鮮虞

左因肥之役也○鮮虞地考見小國門○楚執齊慶封放陳招

殺蔡侯般假討賊之名以盟諸夏而晉連年有事于狄鮮虞至

吳入郢於越入吳晉猶圍鮮虞也晉自是無中國之志矣味傳

傳

○和戎三駕所以復伯楚虜橫而伐鮮虞所以失伯何焯讀

昭十三年傳晉合諸侯于平邱甲車四千乘鮮虞人聞晉師悉起

杜注中山望都縣西北有中人城顧曰在今直隸真定府唐縣

昭十五年秋晉荀吳帥師伐鮮虞

左荀吳圍鼓鼓人或請以城叛穆子弗許鼓人告力竭食盡而

後取之克鼓而反不戮一人以鼓子戴鞮歸○鼓地考見傳載

小國○前伐鮮虞矣今又以卿帥大衆而伐之書以見其務近

攻以闢地而昧遠圖也直解

昭二十二年傳晉之取鼓也鼓獻虜而反鼓子焉又叛於鮮虞六月荀吳畧東陽使師偽釋者負甲以息于昔陽之

門外遂襲鼓滅之以鼓子戴髮歸使涉佗守之

顧曰自是鼓地屬晉矣案是時白狄之種亦絕獨留一鮮虞至

戰國時爲中山王

定三年

傳秋鮮虞人敗晉師於平中獲晉觀虎

定四年秋晉士鞅衛孔圉帥師伐鮮虞

定五年冬晉士鞅帥師圍鮮虞

傳報觀虎之役

哀元年

傳師及齊師衛孔圉鮮虞人伐晉取棘蒲○經止書齊侯衛侯伐晉沒魯與鮮虞不書○救范氏也

哀三年

傳齊衛圍戚求援於中山

杜注中山卽鮮虞○戚爲衛太子蒯聩所居景公方與晉爭伯

助子圉父助臣叛君而皆求助於外裔中國之不道甚矣

顯棟高

哀四年

傳秋齊衛救范氏九月趙鞅圍邯鄲冬十一月邯鄲降荀寅奔鮮虞齊幽夏伐晉會鮮虞納荀寅於柏人

自昭元年以來晉無歲不興邊功置楚不問而與外裔爲難滅

肥鼓并欲剗鮮虞鏡意立功者苟吳范鞅也身歿未幾而其子
爲晉所逐反求託庇顯武之禍至此天道好還可不戒哉願棟
哀六年春晉趙鞅帥師伐鮮虞

左傳見書伐門○昭十二年楚人伐徐之歲楚虔方熾而書晉
伐鮮虞十五年楚寇少安不能輯睦中夏而荀吳伐之定四年
召陵罷會楚有可乘之機而士鞅及衛孔圉伐鮮虞五年吳方
入郢士鞅又伐鮮虞於是盡失諸侯又有趙鞅之伐則晉伯之
衰皆由陪臣封殖貪伐鮮虞故也汪克實纂疏引薛季宣○鮮虞與肥鼓
杜注皆云白狄種歷觀諸傳其地大抵在直隸真保之間益知
史記所云居于河西者誤也願棟

鄭曄

文十一年

傳見前

杜注鄭瞞狄國名防風之後漆姓僑如鄭瞞國之君蓋長三丈
孔疏狄是北夷大號鄭瞞是其國名魯語吳伐越黎會稽獲骨
節專車使問於仲尼曰昔禹致羣臣於會稽之山防風氏後至
禹戮之其骨節專車客曰防風氏何守汪芒氏之君守封隅之
山者也爲漆姓在虞夏商爲汪芒氏於周爲長狄氏長狄狄之
長者彼言於周爲長狄知鄭瞞卽是防風氏之後也穀梁傳曰
長狄瓦石不能害叔孫得臣善射者射其目身橫九畝斷其首
而載之眉見於軾○彙纂案見前赤狄此年條下○先儒皆以
長狄白狄爲國號經當云晉敗白狄于箕叔孫得臣敗長狄于
鹹今經傳皆直云狄而後言御缺獲白狄子叔孫得臣獲長狄
僑如可知狄之君爲赤狄而長狄白狄皆其將佐之臨陣者爾
左傳又言晉之滅潞獲僑如之弟焚如非其明證歟若說僑如

爲鄭瞞之君防風氏之後守封隅之山去中國二千餘里交能
爲患公羊以爲一之齊一之魯一之晉穀梁又以爲直敗一人
之辭自古未有以一人而能爲寇患者誕甚矣

顧棟

又

傳曰晉之滅潞也滅僑如之弟焚如。晉滅潞氏在宣十

五年

焚如是僑如之弟國滅見獲是赤狄之殉難者耳如果有鄭瞞
之國在吳郡永安何爲不歸其國而甘以身爲赤狄殉乎

顧棟

○東夷

僖十九年傳宋襄公用郟子于次睢之社欲以屬東夷論語九夷註
云東方之夷有九種若畎夷黃夷白夷之屬今考春秋左傳杜氏所
稱東夷國絕少如萊介諸國以其僻小不通於中夏故遠外之不若
吳楚越儼然與中國會盟也

顧棟

淮夷

僖十三年

傳淮夷病杞

杜注魯東夷也高顧攷地見小國門

昭四年夏楚子及諸侯淮夷會于申

淮夷自病杞以後百餘年不見經傳楚靈特列之於會者蓋欲

借以病吳猶用越之意也

顧棟高

又 秋楚子以諸侯及淮夷伐吳

昭二十七年 傳范獻子曰季氏甚得其民淮夷與之

介

僖二十九年春介為廬來

地考見小國門○春秋兩書介來以其事言則遠人慕中國也
以其實言則遠人窺中國也春秋不以例之郟黎來而以例之

白狄則非予介可知

李廉會通

又 冬介葛盧來

介再來魯六年遂侵蕭求援而後舉兵與荆人秦術之聘同

張洽

僖三十年秋介人侵蕭

介在山東膠州蕭爲江南徐州府蕭縣相去千餘里越魯而侵

蕭則其來雖未必求援而窺探情事熟覽徑道可知

顧棟高

○附

庸君特來魯則名有事於外及衆見則人屬辭之辨也

高澍然釋經

萊

宣七年夏公會齊侯伐萊

地考見小國門○史記太公封營邱萊人來伐則萊爲齊邊鄙

之患久矣魯與萊中隔一齊素無嫌隙承齊意往會耳

顧棟高

宣九年夏齊侯伐萊

萊近齊故齊必欲服之觀夾谷之會有萊人則萊之屬齊有自

來矣

戴溪講義

○從齊小國也齊再伐之卒於襄六年滅之

李廉會通

襄二年

傳齊侯伐萊萊人使正與子路風沙衛索馬牛皆百匹齊師還秋齊來送葬召萊子不食晏弱城東陽以備之

襄六年冬齊侯滅萊

左曼弱城東陽而還圍萊入之萊共公奔棠曼弱圍棠滅之遷

萊于郕○杜注棠萊邑北海卽墨縣有棠鄉顧曰在今山東萊

州府卽墨縣南自是齊地東際於海矣

根牟

宣九年秋取根牟

地考見小國門○是年齊侯復伐萊而魯於是秋取根牟蓋齊

魯俱懷吞併各就其近處益地也萊在齊之東而根牟在魯東

前曾助齊伐萊伐萊非魯之利特欲悅齊以爲己取根牟之計

耳萊險固而根牟弱小故魯之取較易於齊

顧棟高

昭八年 傳秋蒐于紅自根牟至於商衛革車千乘

商杜注宋地魯西境接宋衛也○顧曰此時根牟已入爲魯邑
傳言其極東以至極西之境

○南蠻

春秋楚境不越洞庭其時蠻夷之在今湖南者皆係徼外世服屬於
楚無由自通中國中國不能舉其號第稱蠻曰羣蠻濮曰百濮以概
之其地爲今某州縣亦難深考獨盧戎以敗屈瑕軍楚滅之爲廬邑
文十六年楚戡黎爲廬大夫侵庸其地在今江漢間畧可紀焉

顧棟高

盧戎

桓十三年 傳楚屈瑕伐羅羅與盧戎兩軍之大敗之

地考見傳載小國

羣蠻

春秋左傳卷之九 卷之十一

文十六年 傳楚大饑羣蠻叛楚

地考見傳載小國

百濮

文十六年 傳麋人率百濮聚于潁將伐楚

昭九年 傳王使詹桓伯告于晉曰濮楚鄧吾南土也

昭十九年 傳楚子為舟師以伐濮

地考見傳載小國

巴

桓九年 傳楚及巴師圍麇

莊十八年 傳巴人叛楚而伐那處

文十六年秋楚人秦人巴人滅庸

地考見小國門

戎狄書子論

赤狄白狄聖人皆書之于經而左氏不著封爵之所自杜預亦弗深考余疑其爵非先王所賜亦非時王別命以土直以戎狄各居一方桀鯀難制大國請於王而命之耳其先之不見於經何也閔僖之世狄最强盛而春秋止書狄蓋其時實未賜爵僖之末年而狄有亂赤狄白狄始分宣三年而赤狄始見經八年白狄始見經自後凡書赤狄者七書白狄者三其時賜爵與否未可知而聖人略之不書者春秋於外裔多從其故號如楚之武文改號楚已久而終莊公之世止書荆人是也逮晉滅諸國則其君臣自誇武功獻俘於王必詳列其國號與其君之爵名如後世之露布自京師昭示遠近春秋安得而不書其爵乎至如甲氏留吁鐸辰則實未有國號未賜爵命聖人亦第從其實書之也至其國名則名從其地潞氏以潞縣得名鼓以鼓

聚肥以肥累城得名此各因廬帳所在從而立稱知出於春秋之季之濫加名器而不得比於徐楚吳越之列明矣推而計之如所稱戎子駒支無終子嘉父戎蠻子嘉及陸渾子者例皆書子無終乃山戎之別種陸渾係秦晉之所遷其非文武之舊封尤最易明者他如經書夔子孔晁註鄭語謂熊摯有疾而自棄于夔子孫有功王命爲建子此亦隱桓以後別封者也夫春秋之國日就微滅而亦有別爲建置如鮮虞亦曰中山至戰國時僭號稱王且與燕趙爲列國矣

顧棟高